



Financial Sector
Conduct Authority

LEANO LA PUO

Lebitso la Tokomane:	Leano la Puo
Nomoro ya Tokomane:	C&L/POL/03/2026-2028
Kopo:	Bolaodi ba Boitshwaro Lekaleng la Ditshebeletso tsa Ditjhelete
Bakeng sa Kgothaletso	Komiti ya Taolo ya Mawa
Bakeng sa Tumello	Komiti ya Phethahatso
E tshebetsong ho tloha:	1 Mmesa 2026
E hlophisitse Ke:	Lefapha la Dikgokahano
Tekolobotjha:	27 Tlhakubule 2026

Leqhephe la Tumello ya Tokomane

Mongatokomane:

LEBITSO	BOEMO	MOSAENO	LETSATSI
Tembisa Marele	Hlooho ya Lefapha: Dikgokahano		

Tokomane e Kgothalleditswe Ke:

KOMITI	MODULASETULO	MOSAENO	LETSATSI
Komiti ya Taolo ya Mawa	Modulasetulo		

Tumello ya Tokomane:

KOMITI	MODULASETULO	MOSAENO	LETSATSI
Komiti ya Phethahatso	Mokhomishenara		

Taolo ya Mofuta le Kgutsufatso ya Diphetofo :

NOMORO	TLHALOSO YA DIPHETOHO
1.	Lena ke leano la pele le ntseng le thehwa ho tiisa le ho beha maamong a tshwanang sebopeho le mokgwa wa ho ngolwa ha maano a BBLDD .
2.	Ho eketswa ha ditlhaloso tse ding le disebediswa tsa molao.

Nako e Tlamang ya Tekolobotjha:

Leano lena le tshwanetse ho lekolwobotjha ka mora dilemo tse ding le tse ding tse pedi.

DIKAHARE

Leqhephe la Tumello ya Tokomane	ii
Mongatokomane:.....	ii
Tokomane e Kgothalleditswe Ke:	ii
Tumello ya Tokomane:	ii
Taolo ya Mofuta le Kgutsufatso ya Diphetoho :	ii
Nako e Tlamang ya Tekolobotjha:	ii
1. DITLHALOSO	5
2. SELELEKELA	6
3. MORERO	6
4. DISEBEDISWA TSA MOLAO	6
5. BOHOLO LE TSHEBETSO YA LEANO	7
6. MAEMO A TAOLO A LEANO LENA	7
7. METHEO	8
8. MOSEBETSI WA BBLDD	8
9. DIPUO TSA SEMMUSO TSA BBLDD	9
10. THEHO LE SEBOPEHO SA DITSHEBELETSO TSA PUO TSA BBLDD	12
11. KWETLISO LE BOKGONI	12
12. PHATLALATSO YA LEANO LENA LE PHIHLELLO HO LONA	12
13. MOKGWA WA HO KENYA DITLETLEBO	13
14. MOKGWA WA BOIPILETSO	13
15. TEKOLO BOTJHA YA LEANO	14
16. TUMELLO	14

1. DITLHALOSO

Leanong lena, ntle le ha moelelo o fapane:

- 1.1 **“Molao”** o bolela Molao wa Tshebediso ya Dipuo tsa Semmuso, wa 2012 (Molao wa 12 wa 2012);
- 1.2 **“Boreile”** e bolela mokgwa wa puo e ngolwang bakeng sa batho ba sa boneng, moo ditlhaku kapa matshwao a emelwang ka dipaterone tsa matheba a phahamisitsweng a utlwang ka menwana;
- 1.3 **“Mokhomishenara”** o bolela Mokhomishenara wa BBLDD;
- 1.4 **“Molaotheo”** o bolela Molaotheo wa Rephaboliki ya Aforika Borwa wa 1996;
- 1.5 **“Komiti ya Phethahatso”** e bolela Komiti ya Phethahatso ya BBLDD;
- 1.6 **“BBLDD”** e bolela Bolaodi ba Boitshwaro Lekaleng la Ditshebeletso tsa Ditjhelete, e leng mokgatlo wa molao o thehilweng ho ya ka karolo ya 56 ya Molao wa Taolo ya Lekala la Ditjhelete, wa 2017 (Molao wa 9 wa 2017);
- 1.7 **“Toloko”** mabapi le puo e buuwang, e bolela phetiso ya molaetsa o buuwang wa puo e nngwe hore e be molaetsa o buuwang wa puo e nngwe; mabapi le puo ya matsoho, e bolela phetiso ya puo ya matsoho hore e be puo e buuwang, kapa ya puo e buuwang hore e be puo ya matsoho; mme **“ho toloka”** ho na le moelelo o tsamaellanang le ona;
- 1.8 **“Puo ya Direkoto”** e bolela puo e kgethilweng bakeng sa ho boloka direkoto kapa ho boloka polokelong direkoto tsa BBLDD;
- 1.9 **“Letona”** le bolela Letona la Dipapadi, Bonono le Setso;
- 1.10 **“Botemengata”** e bolela tshebediso ya dipuo tse tharo kapa ho feta ke motho a le mong kapa sehlopha sa batho;
- 1.11 **“BDTAB”** e bolela Boto ya Dipuo tsohle tsa Aforika Borwa;
- 1.12 **“Leano”** le bolela Leano lena la Puo;
- 1.13 **“Rephaboliki”** e bolela Rephaboliki ya Aforika Borwa;
- 1.14 **“PMAB”** e bolela Puo ya Matsoho ya Aforika Borwa;
- 1.15 **“Setsebi se Seholo sa Puo”** se bolela mosebeletsi wa BBLDD ya etellang pele karolo ya dipuo Lefapheng la Dikgokahano le Ditshebeletso tsa Dipuo;
- 1.16 **“Phetolelo”** e bolela phetiso ya molaetsa o ngotsweng ho tloha puong e nngwe ho ya puong e nngwe, mme **“ho fetoletsa”** ho na le moelelo o tsamaellanang le ona.

2. SELELEKELA

- 2.1. Molaotheo o ananela dipuo tse leshome le metso e mmedi (12) tsa semmuso, e leng Senyesemane, Seaforikanse, Tshivenda, Xitsonga, Sepedi, Setswana, Sesotho, isiZulu, isiXhosa, isiNdebele, Siswati le Puo ya Matsoho ya Aforika Borwa; o boetse o ananela hore tshebediso le maemo a dipuo tsa botswallwa a naha a fokotsehile mme o laela Mmuso ho nka mehato e sebetsang le e nang le phello e ntle ho phahamisa maemo a dipuo tsa botswallwa le ho ntshetsa pele tshebediso ya tsona. Ho feta moo, Molaotheo o hloka hore dipuo tsohle tsa semmuso di fuwe seriti se lekanang le hore di tshwarwe ka tekatekano.
- 2.2. Ka hona, Molao ona o phatlaladitswe ho kgothaletsa tshebediso ya dipuo tsa semmuso puisanong le ditho tsa setjhaba, ho fana ka taolo le tlhokomelo ya tshebediso ya dipuo tsa semmuso ke mmuso wa naha bakeng sa merero ya mmuso, ho laela lefapha la naha, setheo sa setjhaba sa naha le kgwebo ya setjhaba ya naha ho amohela leano la puo hammoho le ho theha yuniti kapa karolo ya dipuo ka hara lefapha la naha, setheo sa setjhaba sa naha le kgwebo ya setjhaba ya naha.
- 2.3. Molao ona o sebetsa ho mekgatlo yohle ya setjhaba ya naha. BBLDD ke setheo sa setjhaba sa naha, ka ha o thathamisitswe jwalo ho Molao wa Taolo ya Ditjhelete tsa Setjhaba wa 1999 (Molao wa 1 wa 1999). Ka lebaka leo, Leano lena le hlophisitswe ke BBLDD ho latela le ho phethahatsa dipehelo tsa Molao ona.

3. MORERO

Morero wa Leano lena ke ho hlakisa ka moo BBLDD e tla ikamahanya le ditlhoko tsa Molao le ho sebedisa dipuo tsa semmuso ho ntlafatsa phano ya ditshebeletso ho ditho tsa setjhaba ka kakaretso le ditheo tse laolwang hammoho le ho ntlafatsa maemo a boikobelo ba melao le ditaello.

4. DISEBEDISWA TSA MOLAO

- 4.1 Molaotheo wa Rephaboliki ya Aforika Borwa wa 1996 (Molaotheo);
- 4.2 Molao wa Taolo ya Lekala la Ditjhelete wa 2017 (Molao wa 9 wa 2017) (Molao wa TLD) le Molao wa Tshebediso ya Dipuo tsa Semmuso wa 2012 (Molao wa 12 wa 2012) (Molao);
- 4.3 Melawana ya Tshebediso ya Dipuo tsa Semmuso ya 2013 (Melawana);
- 4.4 Molao wa Lekgotla la Basebetsi ka Puo la Aforika Borwa wa 2014 (Molao wa 8 wa 2014);

- 4.5 Molao wa Kgodiso ya Phihlello ya Lesedi wa 2000 (Molao wa 2 wa 2000);
- 4.6 Molao wa Taolo ya Ditjhelete tsa Setjhaba wa 1999 (Molao wa 1 wa 1999) (MTDS).

5. BOHOLO LE TSHEBETSO YA LEANO

Leano lena le sebetsa ho basebetsi bohle ba BBLDD, ho kenyeletsa le ba konterakeng le motho e mong le e mong ya etsang mosebetsi mohatong wa BBLDD.

6. MAEMO A TAOLO A LEANO LENA

Leano lena le laelwa ke karolo ya 4 ya Molao, ka mokgwa o latelang:

- 6.1. Karolo ya 4(1) e nehelana ka hore lefapha le leng le le leng la naha, setheo sa setjhaba sa naha le kgwebo ya setjhaba ya naha di tshwanetse ho amohela leano la puo mabapi le tshebediso ya tsona ya dipuo tsa semmuso.
- 6.2. Karolo ya 4(2) e nehelana ka hore leano la puo le amohetsweng ho ya ka karolwana ya (1) le tshwanetse ho:
- 6.2.1. hlwaya bonyane dipuo tse tharo tsa semmuso tseo lefapha la naha, setheo sa setjhaba sa naha kapa kgwebo ya setjhaba ya naha di tla di sebedisa bakeng sa merero ya mmuso;
- 6.2.2. hlakisa ka moo dipuo tsa semmuso di tla sebediswa ka teng puisanong e sebetsang hantle le setjhaba, ditsebiso tsa semmuso, dikgatiso tsa mmuso hammoho le dikgokahano tsa ka hare le tsa pakeng tsa mekgatlo ya mmuso;
- 6.2.3. hlalosa ka moo lefapha la naha, setheo sa setjhaba sa naha kapa kgwebo ya setjhaba ya naha di tla buisana ka katleho le ditho tsa setjhaba tseo puo ya tsona ya boikgethelo e seng e nngwe ya dipuo tsa semmuso tse kgethilweng ke setheo seo;
- 6.2.4. hlalosa ka moo ditho tsa setjhaba di ka fihlellang leano la puo ka teng;
- 6.2.5. fana ka mokgwa wa ho kenya ditsetlebo ho nolofalletsa ditho tsa setjhaba ho hlalosa ditsetlebo mabapi le tshebediso ya dipuo tsa semmuso ke lefapha la naha, setheo sa setjhaba sa naha kapa kgwebo ya setjhaba ya naha; mme

- 6.2.6. phatlalatswa ho Koranta ya Mmuso ka pele ka moo ho ka kgonehang ka teng, empa e seng ka mora matsatsi a 90 ho tloha letsatsing leo e amohetsweng ka lona.

7. METHEO

Metheo e tshehetsang Leano lena ke e latelang:

- 7.1. Ho nka mehato ya ho phahamisa maemo le ho ntshetsa pele tshebediso ya dipuo tsa botswallwa tsa naha.
- 7.2. Boitlamo ba ho phahamisa dipuo tsohle tsa Rephaboliki e le ho nnetefatsa hore dipuo tsa semmuso di fuwa seriti se lekanang le ho tshwarwa ka tekatekano, jwaloka ha ho hlokwa ke tsamaiso ya rona ya sedemokerasi.
- 7.3. Ho ananela botemengata e le mohlodi wa ho matlafatsa tshebedisano ya bohlokwa kahong ya setjhaba, ntshetsopele ya moruo le kopano ya setjhaba.
- 7.4. Ho phahamisa taolo e ntle ya dipuo ka hara BBLDD ho nnetefatsa tsamaiso e sebetsang hantle ya ditshebeletso tsa setjhaba e fihlellang ditlhoko tsa setjhaba le ho nnetefatsa phihlello e lekanang ya ditshebeletso le lesedi la BBLDD.
- 7.5. Ho thibela tshebediso ya puo kapa dipuo dife kapa dife bakeng sa merero ya tlatlapo, puso e hatellang kapa kgethollo ka hara BBLDD.
- 7.6. Boitlamo ba ho nnetefatsa hore metjha ya dijithale le diphatlatso tsa inthaneteng tsa BBLDD di a fihleleha e bile di ka sebediswa ke baamohedi ba fapaneng, ho kenyeletswa batho ba nang le bokowa, ho latela mekgwa e metle e ntseng e fetoha mabapi le phihlello ya dijithale.
- 7.7. Boitlamo ba ho sebedisa metheo ya puo e hlakileng dikgokahanong tsohle tse lebisitsweng setjhabeng, haholoholo tse lebisitsweng ho bareki ba ditshebeletso tsa ditjhelete. Tshebediso ya puo ya setekgeniki kapa ya molao e tla qojwa moo ho kgonehang mme moo e ke keng ya qojwa teng, e tla felehetswa ke ditlhaloso kapa dikakaretso tse hlakileng.

8. MOSEBETSI WA BBLDD

BBLDD ke setheo se ikemetseng se thehilweng ho laola le ho hlokomela boitshwaro ba mebaraka ya ditheo tsa ditjhelete Aforika Borwa. Jwaloka ha ho hlalositswe karolong ya 57 ya Molao wa Taolo ya Lekala la Ditjhelete, dipheo tsa BBLDD ke ho:

- 8.1.** matlafatsa le ho tshehetsa tshebetso e ntle le botshepehi ba mebaraka ya ditjhelete; le
- 8.2.** sireletsa bareki ba ditshebeletso tsa ditjhelete ka ho:
- 8.2.1.** kgothaletsa hore ditheo tsa ditjhelete di tshware bareki ba ditshebeletso tsa ditjhelete ka toka;
- 8.2.2.** fana ka mananeo a thuto ya ditjhelete ho bareki ba ditshebeletso tsa ditjhelete le bao e ka bang bareki ba ditshebeletso tsa ditjhelete le ho kgothaletsa tsebo ya ditjhelete hammoho le bokgoni ba bareki ba ditshebeletso tsa ditjhelete le bao e ka bang bareki ba ditshebeletso tsa ditjhelete ho etsa diqeto tse nepahetseng tsa ditjhelete; le
- 8.2.3.** thusa ho boloka botsitso ba tsamaiso ya ditjhelete.

9. DIPUO TSA SEMMUSO TSA BBLDD

9.1. Kamohelo ya dipuo tsa semmuso ke BBLDD

- 9.1.1.** Molao o laela BBLDD ho amohela leano la puo le hlwayang bonyane dipuo tse tharo (3) tsa semmuso tseo BBLDD e tla di sebedisa bakeng sa “merero ya mmuso”. Sena se bolela dipuo tse tla sebediswa haholoholo ha ho buisanwa le ditho tsa setjhaba.
- 9.1.2.** Ha ho hlwauwa dipuo tsa semmuso, BBLDD e tshwanetse, hara tse ding, ho ela hloko ntshetsopele le phahamiso ya dipuo tsa botswallwa tse neng di kotetswe nakong e fetileng.
- 9.1.3.** Ha ho etswa qeto mabapi le dipuo tsa semmuso tse tla sebediswa, BBLDD e tla tataiswa maemong ohle ke dintlha tse latelang:
- 9.1.3.1.** Bonamo ba tshebetso.
- 9.1.3.2.** Ditjeho tse amanang le tshebediso ya tsona.
- 9.1.3.3.** Sebaka sa tikoloho.
- 9.1.3.4.** Ditabatabelo tsa setjhaba le / kapa tsa sehlopha se itseng se reretsweng.
- 9.1.3.5.** Bokgoni ba BBLDD.
- 9.1.4.** Le hoja BBLDD e ananela dipuo tsohle tsa semmuso tsa Rephaboliki, dipuo tse latelang di amohetswe ka mokgwa o latelang:
- 9.1.4.1.** **Senyesemane** (jwaloka puo ya puisano).
- 9.1.4.2.** Ho tswa sehlopheng sa dipuo tsa Nguni (isiZulu, isiNdebele, Siswati le isiXhosa), ho amohetswe **isiZulu**.

- 9.1.4.3. Ho tswa sehlopheng sa dipuo tsa Sotho (Setswana, Sepedi le Sesotho), ho amohetswe **Setswana**.
- 9.1.4.4. **Tshivenda**, e leng e nngwe ya dipuo tse neng di kotetswe nakong e fetileng mme e sa kenyeletsweng sehlopheng sefe kapa sefe sa dipuo, e amohetswe.
- 9.1.4.5. **Aforikanse**, e leng e nngwe ya dipuo tse sa kenyeletsweng sehlopheng sefe kapa sefe sa dipuo, le yona e amohetswe.
- 9.1.5. BBLDD e tla nnetefatsa hore e sebedisa dipuo tse bontshitsweng temaneng ya 9.1.4 bakeng sa merero ya mmuso jwaloka ha ho hlalositswe temaneng ya 9.2.4.

9.1. Tshebediso ya dipuo tsa semmuso ke BBLDD

- 9.1.1. Tlhaloso ya dipuo tse tla sebediswa bakeng sa merero ya bolaodi hammoho le puisano le ditho tsa setjhaba le mokgwa oo dipuo tseo di tla sebediswa ka wona, e behilwe mona ka tlase.

9.1.2. Merero ya bolaodi

BBLDD e amohela Senyesemane e le puo e ka sehloohong ya puisano le puo ya semmuso ya direkoto bakeng sa merero ya bolaodi: -

- 9.1.2.1. ho buisana le bareki ba yona ba fapaneng (bareki ba ditshebeletso le mekgatlo e laolwang) ho ya ka ditaelo le boikarabelo ba yona;
- 9.1.2.2. mabapi le puisano ya ka hare ho BBLDD; le
- 9.1.2.3. mabapi le puisano ya yona le mmuso le / kapa Palamente ka Letona le ikarabellang.
- 9.1.3. Maemong ao ho ona ho kopuwang ditokomane tse reretsweng ho hlahiswa ka Senyesemane feela ka puo efe kapa efe ya semmuso ntle le Senyesemane, BBLDD e tla fana ka diphetolelo tse akaretsang tsa ditokomane tseo, ho ya ka dipehelo tsa 9.1.3.

9.1.4. Merero ya mmuso

BBLDD e tla sebedisa Senyesemane le dipuo tsa semmuso tse boletsweng temaneng ya 9.1.4 ho ya ka maemo a itseng bakeng sa merero e latelang:

- 9.1.4.1. Puisano le ditho tsa setjhaba, ka molomo le ka sengolwa – ho kenyeletswa, hara tse ding, ditsebiso le diphatlatlatso tsa setjhaba, matshwao a lesedi a setjhaba, matshwao a bontshang meaho le ditshebeletso (ho tla fanwa ka diphetolelo tse akaretsang bakeng sa ditokomane tsa setekgeniki).
- 9.1.4.2. Puisano le boraditaba (mohlala, diphatlatlatso, seyalemoya, thelevishene, diphodekhasa le webosaete) – ho ya ka sepheo le sethala se sebediswang;

- 9.1.4.3. Diphatlalatso tsa semmuso le mangolo a semmuso.
- 9.1.4.4. Mesebetsi e meng ya ho sebedisana le bankakarolo.
- 9.1.4.5. Dipuisano tsa setjhaba kapa ditherisano le setjhaba hammoho le ditsamaiso tse ding tsa semmuso.

Thuto ya Bareki

- 9.1.5. Ho sa natse dipehelo tsa temana ya 9.1.3 e ka hodimo, BBLDD e tla nka mehato e loketseng le e utlwahalang ho nnetefatsa hore e fana ka dithupello tsa thuto ya bareki le tsebo ya tsa ditjhelete ka dipuo tse ngata tsa semmuso ka moo ho ka kgonehang, ho shejwa puo eo setjhaba se nkang karolo dithupelong tseo se e ratang. Ho feta moo, BBLDD e tla nnetefatsa hore disebediswa tsa bohlokwa tsa thuto ya bareki mabapi le ditjhelete di fetolelwa dipuong tsohle tsa semmuso mme di phatlalatswa webosaeteng ya yona e ikgethileng ya thuto ya bareki, e leng www.fscamymoney.co.za, ho latela taelo ya BBLDD mabapi le thuto ya bareki.

Setsi sa Mehala

- 9.1.6. Setsi sa Mehala sa BBLDD se tla ikitlaelletsa ho nolofalletsa puisano le ditho tsa setjhaba ka dipuo tsohle tsa semmuso tsa Rephaboliki, jwaloka ha ho hlalositswe temaneng ya 2.1.

9.2. Phano ya ditshebeletso ka puo e nngwe ntle le dipuo tsa semmuso tse amohetsweng ke BBLDD

- 9.2.1. Moo setho sa setjhaba se lakatsang ho fumana ditshebeletso ka puo ya semmuso e fapaneng le dipuo tse sebediswang ke BBLDD (mohlala, phatlalatsong), setho seo se tshwanetse ho tsebisa BBLDD ka kopo eo ka lengolo, e lebiswe ho Setsebi se Seholo sa Puo. BBLDD e tla etsa ditokisetso tsa ho phethahatsa kopo eo nakong e utlwahalang e seng ka tlase ho matsatsi a mashome a mararo (30) a tshebetso ka mora ho amohela kopo eo.
- 9.2.2. Maamong a puisano ya ka molomo, jwaloka dikopano le tlhoko efe kapa efe ya ditshebeletso tsa botoloki, kopo e tshwanetse ho etswa ka lengolo bonyane matsatsi a mashome a mararo (30) a tshebetso pele ho ketsahalo eo.

9.3. Phano ya ditshebeletso tsa Puo ya Matsoho ya Aforika Borwa le Mongolo wa Boreile

BBLDD e tla nka mehato e utlwahalang le e nahanelang pele ho kenyeletsa ditlhoko tsa phihleho mererong ya yona ya puisano, ho kenyeletswa botoloki ba Puo ya Matsoho ya Aforika Borwa, metjha ya dikgatiso tsa mantswe le dividio tsa lesedi le metjha e meng e fihlillehang jwaloka mongolo wa Boreile, mererong ya yona ya dikgokahano, haholoholo bakeng sa dikgokahano le setjhaba hammoho le dikahare kapa merero ya thuto ya bareki, ho latela dipehelo tsa 9.1.3.

10. THEHO LE SEBOPEHO SA DITSHEBELETSA TSA PUO TSA BBLDD

- 10.1. Jwaloka ha ho hlokeha ho ya ka karolo ya 7 ya Molao, BBLDD e thehile mosebetsi wa ditshebeletso tsa puo ka selemo sa 2014, oo hona jwale o kenyeleditsweng Lefapheng la Dikgokahano. Karolo ya tshebeletso ena ke ho fana ka taolo e ntle ya dipuo ka hara BBLDD le ho nnetefatsa kenyetsetso ya bohle le tshireletso ya bareki ba ditshebeletso tsa ditjhelete ka ditshebeletso tsa puo.
- 10.2. Ditshebeletso tsa puo tsa BBLDD di etelletswe pele ke Setsebi se Seholo sa Puo, se tshehetswang ke basebetsi ba bang ka moo BBLDD e ka bonang ho hlokeha nako le nako. Mosebetsi ona o fuwe disebediswa le mehlodi e lekaneng ho tshehetsa phano ya ditshebeletso tsa wona ka katleho le ho latela molao.
- 10.3. Ditshebeletso tsa puo di tla lekola, nako le nako, kenyo tshebetsong ya Leano lena, ho kenyeletswa mekgwa e hlahang ya dikopo tsa puo, ditsetlebo le ditlhoko tsa phihleleho mme di tla nehelana ka ditlaleho tsa ka hare ho tshehetsa ntlafatso e tswelang pele.

11. KWETLISO LE BOKGONI

E le ho fihlella phethahatso ya Leano lena ka mokgwa wa botsebi le ka katleho, Lefapha la Dikgokahano le tla nnetefatsa hore ho na le kwetliso e lekaneng le bokgoni bo hlokehang bakeng sa ho phetha mesebetsi ya lona.

12. PHATLALATSO YA LEANO LENA LE PHIHLELLO HO LONA

- 12.1. Leano lena le tla phatlalatswa ka dipuo tsohle tsa semmuso tsa Rephaboliki.
- 12.2. Le tla fumaneha webosaeteng ya BBLDD: www.fsca.co.za

- 12.3. Le tla fumaneha ka mongolo wa Boreile kapa ka mokgwa o mong wa kgatiso ya lentswe webosaeteng ya BBLDD.
- 12.4. Kakaretso ya Leano lena e tla pepeswa ofising ya BBLDD ka mokgwa o etsang hore e bonahale habonolo ho setjhaba.
- 12.5. Ho feta moo, dikhopi tse hatisitsweng tsa Leano lena di tla fumaneha ka dipuo tsohle tsa semmuso meahong ya BBLDD.

13. MOKGWA WA HO KENYA DITLETLEBO

- 13.1. Motho ofe kapa ofe ya sa kgotsofalleng qeto ya BBLDD mabapi le tshebediso ya yona ya dipuo tsa semmuso a ka kenya tletlebo ka lengolo ka ho e lebisa ho Mokhomishenara.
- 13.2. Tletlebo e tshwanetse ho kenngwa ka mokgwa o latelang:
 - 13.2.1. E tshwanetse ho ba ka lengolo.
 - 13.2.2. E tshwanetse ho kenngwa nakong ya dikgwedi tse tharo ho tloha nakong eo sesosa sa tletlebo se hlahleng ka yona.
 - 13.2.3. E tshwanetse ho bolela lebitso, aterese le dintlha tsa puisano tsa motho ya kenyang tletlebo.
 - 13.2.4. E tshwanetse ho fana ka tthaloso e felletseng le e qaqileng ya tletlebo.
- 13.3. Mokhomishenara kapa mosebeletsi e moholo ya filweng matla ke Mokhomishenara a ka kopa motletlebi ho fana ka lesedi lefe kapa lefe e eketsehileng le hlokehang bakeng sa ho lekola tletlebo le ho ba teng kopanong bakeng sa dipatlisiso tsa ka molomo mabapi le tletlebo eo.
- 13.4. Mokhomishenara o tla lekola tletlebo mme a etse qeto nakong e sa feteng dikgwedi tse tharo (3) ka mora hore tletlebo e kenngwe mme a tsebise motletlebi ka qeto eo.
- 13.5. Dintlha tsa kgokahano tsa BBLDD:
 - Setsi sa Mehala: 0800 20 37 22
 - Mohala (setsi sa phetiso ya mehala): 012 428 8000
 - Aterese ya imeile: communications@fsca.co.za
 - Aterese ya poso: P.O. Box 35655, Menlo Park 0102
 - Aterese ya seterata: Riverwalk Office Park, Block B, 41 Matroosberg Road (hukung ya Matroosberg Road le Garsfontein Road), Ashlea Gardens, Extension 6, Menlo Park, Pretoria
 - Webosaete: www.fsca.co.za

14. MOKGWA WA BOIPILETSO

- 14.1. Motletlebi ya sa kgotsofalleheng qeto ya Mokhomishenara a ka kenya boipiletso ho Komiti ya Phethahatso ya BBLDD.

- 14.2. Boipiletso bo iswang ho Komiti ya Phethahatso bo tshwanetse ho lebiswa ho yona ka Mongodi mme bo tshwanetse ho kenngwa nakong ya kgwedi e le nngwe ho tloha letsatsing leo qeto e entsweng ka lona.
- 14.3. Dipehelo tsa temana ya 13.2 tsa Leano lena di tla sebetsa, *ka diphetoho tse hlokehang ho latela maemo*, boipiletsong bo kenyeditsweng ho ya ka temana ya 14.1 ya Leano lena.

15. TEKOLO BOTJHA YA LEANO

Leano lena le tla hlahlojwa botjha dilemong tse ding le tse ding tse pedi.

16. TUMELLO

Lena ke Leano la Puo la moraorao la BBLDD le amohetsweng ke Komiti ya Phethahatso ya BBLDD ka la 27 Tlhakubele 2026.